



Inatsisartuni ilaasortaq

Kalistat Lund

Inuit Ataqtigiit

/MAANI

§ 37 naapertorlugu Alluitsup Paani Qorlortorsuarmi erngup nukinganik innaallagissiorfimmiit innaallagissamik pilersuineramik pilersitsisoqarsinnaanersoq aamma Qaqortup, Nanortallip Narsallu akornanni nalunaarasuartaatinut kabelimik pilersitsisoqarsinnaanersoq pillugu apeqput nr. 65-imut akissuteqaat

03-03-2016
Sags nr. 2016 - 3625
Akt. nr. 2248781

Postboks 1614
3900 Nuuk
Tlf. (+299) 34 50 00
Fax (+299) 34 54 10
E-mail: paian@nanoq.gl
www.naalakkersuisut.gl

Asasara Kalistat Lund

Februaarip ulluisa 18-anni Alluitsup Paani Qorlortorsuarmi erngup nukinganik innaallagissiorfimmiit innaallagissamik pilersuineramik pilersitsisoqarsinnaanersoq aamma Qaqortup, Nanortallip Narsallu akornanni nalunaarasuartaatinut kabelimik pilersitsisoqarsinnaanersoq pillugu Naalakkersuisunut apeqputeqarputit. Apeqputit uannut akisassanngorlugit innersuunneqarput. Ineqarnermut, Sanaartornermut Attaveqaqatigiinnermullu Naalakkersuisup apeqput 2 akissuteqarfigaa, nalunaarasuartaatitigut attaveqaqatigiinneq naalakkersuisoqarfiata ataaniimmat.

Apeqput 1: Qorlortorsuup nukissiorfianiit Alluitsup-Paa innaallagissamik pilersorneqalissappat attavilernissaa qanoq akeqassava?

Naalakkersuisut paasissutissanik apeqqummut akissuteqarnissaminut isumassarsiorfissanik pissarsiniarput.

Nukissiorfiit missingersuutininik naatsorsuineranni takutinneqarpoq, Qorlortorsuarmi erngup nukinganik innaallagissiorfimmiit Alluitsup Paanut innaallagissamik pilersuinermut aqqusersuutininik pilersitsinissaq 85 mio. koruunit missaannik aningaasaliiffiussasoq. Tamatuma saniatigut ukiumoortumik aserfallatsaaliuinermut aningaasartuuteqartoqartassaaq, ukiumut 200.000 koruunit missaanniittussatut naatsorsuutigineqartunik.

Alluitsup Paata aamma Qorlortorsuarmi erngup nukinganik innaallagissiorfiup akornat 40 km-inik isorartussuseqarpoq. Aqqusersuutininik sananerup saniatigut aamma Alluitsup Paani Qorlortorsuarmillu transformereqarfimmik koblingeqarfimmillu sanasoqartussaavoq.

Aqqusersuut ukiut 35-t missaannik atasinnaassuseqarpoq.

Erseqqissaatigineqassaaq, Alluitsup Paani innaallagissiorfik pioreersoq kingullermik 2006-imi allilerneqarmat. Innaallagissiorfiup ukiut 17-t missaanni ataqqissinnaanissaa naatsorsuutigineqarpoq, 2018-imi 5 mio. koruunit missaanik aningaasaliiffigineqassalluni. Qorlortorsuarmi Erngup Nukinganik Innaallagissiorfimmii aqqusersuummik sanasoqassappat, aningaasaliissutissat taakku soorunami sipaarneqarsinnaapput. Tamatuma saniatigut ukiumut ikummatissamut aningaasartuutit 1,7 mio. koruunit missaanniittut aammalu ingerlaavartumik aserfallatsaaliuineq sipaarneqarsinnaapput.

Apeqqut 2: Søkabel-ip iluaqutigineqarnissaata inerisaavigineqarnerani nunatta kujataani Nanortalik Narsarlu Qaqortumiit højhastighedskæde atorlugu attavilerneqassappata qanoq akeqassanersoq. (Nuummiit avannamut Aasiannut, Aasianniillu højhastighedskæde atorlugu Qasigiannuanut Ilulissanullu pilersaarusiortoqareernikuuvoq qanorlu akeqarnissaa ilisimaneqareerluni.)

Ineqarnermut, Sanaartornermut Attaveqaqatigiinnermullu Naalackersuisup Knud Kristiansenip tapiliussassaanik piniartoqarpoq, apeqqut nalunaarasuartaateqarnermut attuumassuteqartutut naliliiffigineqarmat.

Naalackersuisoq Knud Kristiansen ilisimatitsivoq, akissuteqarnissamut atugassamik TELE-POST oqaaseqartinneqartoq, tassanngaanniillu imatut ilisimatitsisoqarpoq:

”Kalaallit Nunaata kujataani sumiiffimmi pineqartumi internettikkut pisinnaasat ukiuni tulliuuttuni naammattussatut naatsorsuutigineqarmata, Kalaallit Nunaata kujataani radiokædep pisinnaasaanik annertusititsinissamik TELE-POST pilersaaruteqanngilaq, taamaattumillu ingerlatseqatigiiffimmit radiokædep annertusinissaa qanoq akeqassanersoq tunngavissalimmik eqqoriarneqarsinnaanngilaq. Qeqertarsuup Tunuani højhastighedskæde atorlugu attaviliinissaq aamma Kalaallit Nunaata kujataani isorartussutsinut naleqqiulluni allaanerungaatsiarpoq, ilaatigut Qeqertarsuup Tunuani højhastighedskæde atorlugu attaviliinissami pilersaarutaasumi radiop maligaasaanik radiokædeqarfiit inoqanngitsut, soorlu Kalaallit Nunaata kujataani pisussatut, aqqutigalugit nassiussisarnissaq pisariaqartinneqartussaangimmat. Sarfaq atorneqartussaq tamarmi Nukissiorfiit innaallagissamut akigititai nalinginnaasut atorlugit tunisassiarineqartartussaavoq, Kalaallit Nunaata kujataani TELE-POST nammineerluni generatorit seqernullu qinngornerinik innaallagissiuutit atorlugit sarfaliortartussaalluni, taakkunungalu ingerlatsinermut aningaasartuutit, soorlu misissuiartornermut sakkortusaavinnillu orsersuiartornermut atatillugu angallatinik qulimiguulinnillu

attartornermut ilaneqartarnissaat ilanngunneqassapput. Taamaattumik aamma isorartussutsini marlunni taakkunani sanaartornermut ingerlatsinermullu aningaasartuutit assigiinngitsorujussuusussaapput.”

Inussiarnersumik inuulluaqqusillunga

Mala Høy Kúko